

ILUARSIISSUT

**Isumaliutissiissut 8. april 2019-imik ullulik taarserpaa.
(Isumaliutissiissummi kapitalini 2.3-mi, 2.4-mi kiisalu 9.3-mi ataatsimiititaliap
innersuussutaanut iluarsissutit)**

2018-imi ilassutitut aningaasaliissutitut inatsisissatut siunnersuut

pillugu

Aningaasaqarnermut Akileraartarnermullu Ataatsimiititaliap

Inatsisissatut siunnersuutip aappassaaneerpeqarneranut

ISUMALIUTISSIISSUTAA

Ataatsimiititaliap suliarinninnermini kingullermik ilaasortarai:

Inatsisartunut ilaasortaq Hermann Berthelsen, Siumut, siulittaasoq
Inatsisartunut ilaasortaq Peter Olsen, Inuit Ataqatigiit, siulittaasup tullia
Inatsisartunut ilaasortaq Karl Kristian Kruse, Siumut
Inatsisartunut ilaasortaq Jess Svane, Siumut
Inatsisartunut ilaasortaq Randi V. Evaldsen, Demokraatit
Inatsisartunut ilaasortaq Múte Bourup Egede, Inuit Ataqatigiit
Inatsisartunut ilaasortaq Jens Napaattoq, Partii Naleraq

Ulloq 27. marts 2019-imi siullermeerinninnerup kingorna ataatsimiititaliap siunnersuut misissorpaa.

Imarisai

1.	<i>Aallaqqaasiut</i>	3
2.	<i>Ilassutitut aningaasaliissutininut inatsit</i>	4
2.1	Ilassutitut aningaasaliissutininut inatsisissatut siunnersuummik saqqummiussineq	4
2.2	Ilassutitut aningaasaliissutininut inatsisip imarisai	4
2.3	Aningaasaliissutinik allannguinnissamik qinnuteqaateqarnissamut piumasaqaatit	4
2.4	Aningaasaliissutit iliuutsillu oqaasertaliussatigut aalajangersakkanik tunngavillit	5
2.5	Aningaasartuutinik isertitanillu nakkutilliineq	5
3.	<i>Naalackersuisut 2018-imi Aningaasaqarnermut Akileraartarnermullu Ataatsimiititaliamut aningaasaliissuteqarnissamik qinnuteqaataat</i>	6
4.	<i>2018-imi aningaasanut inatsit aamma 2018-imi ilassutitut aningaasaliissutininut inatsisissatut siunnersuut – kisitsisit pingaarnerit aningaasaleeriaatsinullu agguataarinerit</i>	7
4.1	Kisitsisit pingaarnerit aningaasanngorlugit	7
4.2	Ilassutitut aningaasaliissutit (inatsisissatut siunnersuummi § 1) – allannguutit oqartussaasunit assigiinngitsunit pingasunit akuersissutigineqartut	7
4.3	Naalackersuisut oqaasertaliussamut innersuussillutik akuersissutigisaat	8
4.4	Aningaasaqarnermut Akileraartarnermullu Ataatsimiititaliamit akuersissutigineqartut	8
4.5	Inatsisartut Suleriaaseq pillugu Ataatsimiititaliaannit akuersissutigineqartut (suliassaqarfik 01)	9
5.	<i>Oqaasertaliussanik allannguinerit (inatsisissatut siunnersuummi § 2)</i>	9
6.	<i>Sillimatinut kontomit 20.11.50-imit atugassiissutiginninnerit</i>	9
7.	<i>Aningaasaqarnermut Akileraartarnermullu Ataatsimiititaliap nalinginnaasumik oqaaseqaatai</i>	9
7.1	Ataatsimut isigalugu	9
7.2	Sulisorisat pillugit paasissutissat	9
8.	<i>Aningaasaqarnermut Akileraartarnermullu Ataatsimiititaliap inatsisissatut siunnersuummut oqaatigiumasai allat</i>	10
8.1	Nalinginnaasumik oqaaseqaatit	10
9.	<i>2018-imi aningaasaliissuteqarnissamik suliassanut oqaaseqaatit</i>	10
9.1	Tunngavik pingaarutilik	10
9.2	Ukioq aningaasanut inatsisip atuuffia	11
9.3	Pingaaruteqartuunissaannik sillimaffigereerneqarsinnaasimanninnissaannillu inatsimmi piumasaqaat	11
9.4	Missingersuutininut sunniuteqannginnissaq aningaasaqarnermillu aqutsineq	12
9.5	Oqaasertaliussat	12
9.6	Pissutsit allat	12
10.	<i>Aningaasaqarnermut Akileraartarnermullu Ataatsimiititaliap kaammattuutai</i>	13
	Kaammattuut nr. 1	13
	Kaammattuut nr. 2	14
11	<i>Aningaasaqarnermut Akileraartarnermullu Ataatsimiititaliap oqaaseqaatai:</i>	14
12.	<i>Aningaasaqarnermut Akileraartarnermullu Ataatsimiititaliap inassuteqaatai</i>	14

1. **Aallaqqaasiut**

2018-imi ilassutitut aningaasaliissutitut inatsisissatut siunnersuut Aningaasaqarnermut Nunanilu Avannarlerni suleqatigiinnermut Naalakkersuisumit Inatsisartut 2019-imi upernaakkut ataatsimiinneranni saqqummiunneqarpoq. Inatsisissatut siunnersuut siullermeerneqarami Aningaasaqarnermut Akileraartarnermullu Ataatsimiititaliamit suliarineqartussanngorlugu innersuunneqarpoq. Inatsisissatut siunnersuut Aningaasaqarnermut Akileraartarnermullu Ataatsimiititaliap suliaraa matumuunalu Inatsisartut inatsisissatut siunnersuummik aappassaaneerinninnissaannut isumaliutissiissuteqarluni.

Nunatta karsiata naatsorsuutai, Sanaartugassanut Iluarsagassanullu Aningaasaateqarfik aammalu missingersuutitut ingerlaavartumik malitseqartitsissutit ilassutitut aningaasaliissutitut inatsit peqatigalugu tassaapput pisortat aningaasaqarnermik aqutsineranni naalakkersuinikkut tunngaviit pingaarutillit ilaat.

Pingaartumik aningaasaliissutitut allannguutit Naalakkersuisunit akuerineqartut ilassutitut aningaasaliissutitut inatsisikkut Inatsisartunut ilaasortanit tamanillu aatsaat ataatsimoortumik takuneqarsinnaalersarput. Taamaattumik Naalakkersuisut allanngugaat taakku aningaasaqarnikkut anner-tuumik pingaaruteqarsinnaasut eqqortumik tunngaveqarluni pisimanersut nalilissallugu Aningaasaqarnermut Akileraartarnermullu Ataatsimiititaliaq – naggataatigullu Inatsisartut – suliaasaqarput annikinngitsumik.

Aningaasaliissuteqarnissamik qinnuteqaatit Naalakkersuisunit ukiup siuliani tiguneqartut ilaat isumaliutissiissummi matumani Aningaasaqarnermut Akileraartarnermullu Ataatsimiititaliamit paasissutissiissutigineqarput. Aalajangiinerit tamarmiusut Inatsisartut nittartagaanni <http://inatsisartut.gl-ip> ataani ingerlaqqiffissiami ”Aningaasaqarnermut Ataatsimiititaliap aalajangigai”-ni pissarsiarineqarsinnaapput.

Isumaliutissiissut ima aaqqissugaavoq:

Isumaliutissiissutit matuma immikkoortuani 2-mi missingersuutit pillugit inatsimmi aalajangersakkat aammalu ilassutitut aningaasaliissutitut inatsisissatut siunnersuummik saqqummiussisarnermut inatsisitigut tunngaviit ataatsimiititaliamit takussutissiissutigineqarput.

Aningaasanut inatsimmi 2018-imi angusassatut missingersuutigineqartumut sanilliullugu 2018-imi aalajangiinerit aningaasatigut kingunerisaat immikkoortuni 4-imi paasissutissiissutigineqarput.

Oqaasertaliussanut aningaasanullu inatsimmi sillimmatitut kontoni 2018-imi allannguinerit immikkoortoq 5, 6 aamma 7-imi misissorneqarlutillu naliliiffigineqarput.

Inatsisissatut siunnersuummi ajornartorsiutit, kukkunerit amigaatillu immikkoortoq 8-mi nassuiaateqarfigineqarput.

Aningaasaliissuteqarnissamik suliassanut 2018-imi Aningaasaqarnermut Akileraartarnermullu Ataatsimiititaliamit suliarineqartunut nalinginnaasumik oqaaseqaatit immikkoortoq 9-mi eqikkaavigineqarput.

Ataatsimiititaliaq immikkoortoq 10-imi inatsisissatut siunnersuummut arlalinnik kaammattuuteqarpoq.

Immikkoortoq 11-mi ataatsimiititaliaq inatsisissatut siunnersuummut nalinginnaasumik oqaaseqaateqarpoq kiisalu immikkoortoq 12-imi ataatsimiititaliap inatsisissatut siunnersuummut inassuteqaatai nalunaarneqarlutik.

Inatsisissatut siunnersuutip aappasaaneerneqarnissaanut taama oqaaseqarluni Aningaasaqarnermut Akileraartarnermullu Ataatsimiititaliaq matumuuna isumaliutissiissuteqarpoq.

2. Ilassutitut aningaasaliissutinut inatsit

2.1 Ilassutitut aningaasaliissutinut inatsisissatut siunnersuummik saqqummiussineq

Inatsisartut Naalakkersuisullu pillugit Inatsisartut inatsisaanni § 16, imm. 3-mi aalajangersarneqarpoq Naalakkersuisut ilassutitut aningaasaliissutinut inatsisissatut siunnersuut kingusinnerpaamik ukiup aningaasanut inatsisip atuuffiata kingorna Inatsisartut ileqquusumik ataatsimiinnissaannut siullermut Inatsisartunut saqqummiuttassagaat. Taamaalilluni pineqartoq tassaavoq aningaasaliissutaareersunut inatsit, Suleriaaseq pillugu Ataatsimiititaliap aamma Aningaasaqarnermut Akileraartarnermullu Ataatsimiititaliap siusinnerusukkat aalajangigaannik aalajangersakkatigut tunngavissiisoq.

Aningaasaliissutaareersunut inatsisip pineqarnerata kingunerisaanik 2018-imi aningaasanut inatsit aamma 2018-imi ilassutitut aningaasaliissutinut inatsit katillutik aningaasaliissutit oqaasertaliussallu 2018-imi atuuttut suunerinik takussutissiisussaapput. Taamaalillutik aningaasaliissutit 2018-imi aningaasanut inatsimmi aamma 2018-imi ilassutitut aningaasaliissutinut inatsimmi ilaatinneqartut, taakkunungalu ilanngullugit sanaartugassanut tunngasuni suliassanut aningaasaliissutit, Nunatta Karsiata 2018-imi naatsorsuutaanut aamma 2018-imi Sanaartugassanut Iluarsagassanullu Aningaasaateqarfik pillugu Nassuiaammut tunngaviupput. Nunatta Karsiata naatsorsuutai Sanaartornerlu pillugu Nassuiaat Inatsisartut upernaakkut ataatsimiinneranni nalinginnaasumik saqqummiunneqartarput.

2.2 Ilassutitut aningaasaliissutinut inatsisip imarisai

Ilassutitut aningaasaliissutinut inatsisip imarisarpaa inatsisip ileqqussat naapertorlugit oqaasertaa, ukununnga tunngasunik nalinginnaasumik marlunnik paragrefeqartartoq:

- *Namminersorlutik Oqartussat 2018-imit aningaasartuutissat isertitassallu* allannguutaat, (ilanngussaq 1), aamma
- *2018-imit oqaasertaliussat* allannguutaat, (ilanngussaq 2)

2.3 Aningaasaliissutinik allannguinnissamik qinnuteqaateqarnissamut piunasaqaatit

Missingersuusiornermut malittarisassami 2018-imeersumi aalajangersarneqarpoq nutaanik aningaasaliissuteqartoqarnissaanik aningaasaliissutinilluunniit allanngortitsisoqarnissaanik qinnuteqaatit taamaallaat tassaassasut:

- *pingaarutillit*, aamma
- aningaasanut inatsisissap suliarinerani *sillimaffigereerneqarsinnaasimannigitsunut* tunngasut.

Ulluinnarni periususartut naapertorlugit Aningaasaqarnermut Naalakkersuisoq Naalakkersuisut sinnerlugit aningaasaliissutit allanngortinneqarnissaannik qinnuteqaammik Aningaasaqarnermut Akileraartarnermullu Ataatsimiititaliamut nassiussisarpoq. Pappialat atortussat nassiunneqartut kontonut pingaarnernut, aningaasaliissutinik allanngortitsiffiginiarlugit qinnuteqaatigineqartunut, missingersuutitut ilanngussanik imaqartussaapput.

Taamaallilluni allannguutissatut qinnuteqaatigineqartup nassuiarnerata tunngavilersuutitaatalu suliap nalilersuiffiginissaanut naammattumik sukumiissuseqarnissaat pingaaruteqarpoq. Erseqqis-sarneqassaaq allannguutip aningaasanut inatsimmi tunngavissaatitaasunut naleqqiullugu qanoq ittuunera pingaarnarpaatinneqassammat.

2.4 Aningaasaliissutit iliuutsillu oqaasertaliussatigut aalajangersakkanik tunngavillit

Inatsisartut Naalakkersuisullu pillugit Inatsisartut inatsisaanni § 16, imm. 2-mi aalajangersarneqarpoq:

"Inatsisartut Aningaasaqarnermut Ataatsimiititaliaata siunertanut aningaasartuutaasussat aningaasanut inatsisip akuersissutigineqarnerani siumut naatsorsuutigineqarsimanngitsut Inatsisarut sinnerlugit akuersissutigisinnaavai."

Aalajangersakkakkut tassuuna ilaatigut erseqqissarneqarpoq aningaasartuutit aningaasanut inatsimmi tunngavissaatitaasunit allaasut Aningaasaqarnermut Akileraartarnermullu Ataatsimiititaliaq sioqqut-sisumik akuersissuteqareersimatinnagu aningaasartuutigeqqusaanngitsut.

Inatsisartut Naalakkersuisullu pillugit Inatsisartut inatsisaanni § 16, imm. 3-mi aalajangersarneqarpoq:

"Inatsisartut Aningaasaqarnermut Ataatsimiititaliaata aningaasartuutissatut akuersissutai ukiumoortumik ilassutitut aningaasaliissutinut inatsimmi, ukiumi aningaasanut inatsiseqarfiusumi tulluuttumi Inatsisartut ileqquusumik siullermeerlutik ataatsimiinneranni oqaluuserineqartussami, katersorneqassapput."

2.5 Aningaasartuutininik isertitanillu nakkutillineq

Missingersuutit pillugit inatsit naapertorlugu missingersuutit pillugit ilisimatitsissummik ataatsimik ukiumoortumik Inatsisartunut saqqummiussinissaq Naalakkersuisut taamaallaat pisussaaffigaat.

Naalakkersuinikkut killiliussat (Inatsisartunit akuerineqartut) aningaasanut inatsimmi ersersinneqartut eqquutsinneqarnissaat missingersuutit pillugit ilisimatitsissuteqartarnermi siunertaavoq. Tamatuma saniatigut suliasaqarfinni aningaasaliissutit atorneqarnissaat ilimagineqartinnagu imaluunniit suliasaqarfinni aningaasaliissutit naammannngitsillugit missingersuutininik malitseqartitsineq iluarsiinissamat periarfissiisarpoq. Taamaattumillu missingersuutininik malitseqartitsineq ilassutitut aningaasaliissuteqarnissamik qinnuteqaatit ingerlaavartut Aningaasaqarnermut Akileraartarnermullu Ataatsimiititaliamit suliarineqarnerinut atatillugu sakkussaavoq pingaaruteqartoq.

Isertitat aningaasartuutillu aningaasanut inatsimmi tunngavissaatitat malillugit ineriartorfiunerannik qulakkeerinninnissaq missingersuutininik malitseqartitsisarnerup ilaatigut siunertaraa. Missingersuutininik malitseqartitsisarnerup aamma siunertaraa paasissutissanik pissarsinissaq, taamaaliornikkut

Naalakkersuisut, Inatsisartut inuiaqatigiillu Namminersorlutik Oqartussat aningaasaqarnerannik paasisaqartinneqaqqullugit, taamaalillunilu aamma aningaasartuutinik tulleriiaarnermi tunngavissaqaqqullugu.

3. Naalakkersuisut 2018-imi Aningaasaqarnermut Akileraartarnermullu Ataatsimiititaliamut aningaasaliissuteqarnissamik qinnuteqaataat

Aningaasaqarnermut Akileraartarnermullu Ataatsimiititaliap aningaasaleeriaatsit uku allanngortinneqarnissaat nalinginnaasumik suliarisarpaa:

- *Ingerlatsineranut aningaasaliissutit*
- *tapiissutitut aningaasaliissutit, aamma*
- *sanaartornermut aningaasaliissutit.*

Taakku avataatigut soorunami ilaapput oqaasertaliussat suliassallu allat, pissutsit immikkut ittut pissutigalugit Naalakkersuisut atugassiinissaminni ataatsimiititaliamut akueritittariaqarsimasaat. Aningaasanut inatsisip ukiuani 2018-imi aningaasaliissutinut sunniuteqartumik suliassat 47-simapput. Suliassaq ataaseq Inatsisartut Suleriaaseq pillugu Ataatsimiititaliaannit akuerineqarput suliassallu arfineq marluk Naalakkersuisunit akuerineqarlutik. Suliassaa ataaseq inassuteqaatinik Naalakkersuisunit akuerineqartussanik allanillu Aningaasaqarnermut Akileraartarnermullu Ataatsimiititaliamit akuerineqartussanik imaqaarsimavoq.

Qinnuteqaatit 40-t Aningaasaqarnermut Akileraartarnermullu Ataatsimiititaliamit 2018-imi suliarineqarsimapput, taakkunanga 38-t akuerineqarlutik, marlulli Inatsisartunut qinersinissap nalunaarutigineqarnera pissutigalugu suliarineqarsimanatik. 2018-imi ukiunilu siuliini suliati amerlassusiat takussutissiami ataaniittumi takuneqarsinnaavoq.

Ukioq	Suliat amerlassusiat
2014	31
2015	22
2016	39
2017	46
2018	40

Takussutissiami takuneqarsinnaasutut ukiuni kingullerni pingasuni suliassat ataatsimiititaliamut nassiunneqartut ataatsimut isigalugu amerliartorsimapput. Tamanna tunngaviummik isigineqartariaqarpoq, tassami Aningaasanut Akileraartarnermullu Ataatsimiititaliamut aningaasaliinissamik qinnuteqaatit taama amerlatiginerat nunatta karsiata aningaasartuutaanik ataatsimoortumik tulleriiaarilluni pingaarnersiunerup aningaasanut inatsisikkut ersersinneqarnissaanik missingersuutinut inatsimmi tunngavimmut naapertuuttutut isigineqarsinnaanngimmat.

Suliassat aalajangiiffigisassat 46-t pineqartut Aningaasaqarnermut Naalakkersuisumit tiguneqarnermik kingorna ataatsimiinnermi tullermi Aningaasaqarnermut Akileraartarnermullu Ataatsimiititaliamit nalinginnaasumik suliarineqartarsimapput.

4. 2018-imi aningaasanut inatsit aamma 2018-imi ilassutitut aningaasaliissutitut inatsisissatut siunnersuut – kisitsisit pingaarnert aningaasaleeriaatsinullu agguataarinerit

4.1 Kisitsisit pingaarnert aningaasanngorlugit

2018-imi aningaasanut inatsimmi aamma 2018-imi ilassutitut aningaasaliissutitut inatsisissatut siunnersuummi kisitsisit pingaarnert aningaasanngorlugit takussutissiarineqarnerat 2018-imi ilassutitut aningaasaliissutitut inatsisissatut Naalakkersuisut siunnersuutaata danskisuuani quppernemi 49 aamma 50-imi kalaallisuuani quppernemi 55 aamma 56-imi takuneqarsinnaapput, taakkulu innersuussutigineqarput.

2018-mut Aningaasanut inatsit IS-mi 11,2 mio. kr.-nik sinneqartooruteqarfissatut missingersuutaavoq. IS-imut missingersuutigineqartut inernerinut tunngatillugu taamaalillutillu aningaasaliissutit taarsigassarsiaritinneqartortaannik (T) ilaqartinnagit, taamaallaat ingerlatsinerimut sanaartornermullu tunngasuullutik, taava ilassutitut aningaasaliissutit akuersissutigineqartut IS-ip inerneranum missingersuutini 145,0 mio. kr.-nik ajorseriarnerannik kinguneqarput.

Taamaalimmat Ilassutitut aningaasaliissutitut inatsisissatut siunnersuutip kingunerissavaa ukiumut aningaasaliiviusumut 2018-imut 133,8 mio. kr.-nik IS-imi amigartoortoqarnissaanik missingersuusiorneq.

Aningaasanut inatsimmi 2018-imoortumi IST-mi amigartoortussatut 6,7 mio. kr.-t missingiunneqarput. Inatsisartut Aningaasaqarnermut Akileraartarnermullu Ataatsimiititaliaata aamma Inatsisartut Suleriaasiannut Ataatsimiititaliap 2018-ip ingerlanerani ilassutitut aningaasaliissutit katullugit arfinillit akueraat, taamaalilluni IST-mi inernerussatut missingersuutit 145,0 mio. kr.-nik ajorne-rulersillugit. Ilassutitut aningaasaliissutitut inatsisissatut siunnersuut taamaalilluni ukiumut aningaasaqarfiusumut 2018-mut IST-mi 151,7 mio. kr.-nik amigartoorteqarfivoq.

Matumani eqqaamasariaqarpoq angusassatut *missingersuutit* inaarutaasumillu *naatsorsuutitigut angusat* assigiinngimmata. 2018-imi inaarutaasumik naatsorsuutitigut angusat 2018-imi Nunatta Karsiata naatsorsuutaani takuneqarsinnaapput.

4.2 Ilassutitut aningaasaliissutit (inatsisissatut siunnersuummi § 1) – allannguutit oqartussaasunit assigiinngitsunit pingasunit akuersissutigineqartut

Inatsisissatut siunnersuummi ilaapput ilassutitut aningaasaliissutit ukuninnga akuersissutigineqartut

- Naalakkersuisunit, oqaasertaliussanik innersuussinikkut
- Aningaasaqarnermut Akileraartarnermullu Ataatsimiititaliamit
- Inatsisartunit/Inatsisartut Suleriaaseq pillugu Ataatsimiititaliaannit

Aningaasaliissutit allannguutaat aalajangersimasut *Aningaasaliissutininut takussutissiame, inatsisitatut siunnersuummi ilanngussaq 1-imi*, takuneqarsinnaapput. Allannguutit ataasiakkaat missinger-suutininut ilanngussartaqarput, taakkunanilu allannguutit erseqqinnerusumik nassuiarneqarput. *Ilanngussaq 1-imi taamatullu missingersuutininut ilanngussani takuneqarsinnaassaaq* Aningaasaqarnermut Akileraartarnermullu Ataatsimiititaliaq Naalakkersuisulluunniit imaluunniit Inatsisartut Suleriaaseq pillugu Ataatsimiititaliaat aningaasaliissutinik allannguisoqarnissaanik qanga akuersisimanersut suliarlu sorleq pineqarnersoq.

4.3 Naalakkersuisut oqaasertaliussamut innersuussillutik akuersissutigisaat

Oqaasertaliussat tunngavigalugit aningaasaliissutinik nuussinerit arfineq marluk Naalakkersuisunit akuersissutigineqarput. Qinnuteqaat ataaseq inassuteqaatinik Naalakkersuisunit akuerineqartussanik allanillu Aningaasaqarnermut Akileraartarnermullu Ataatsimiititaliamit akuerineqartussanik imaqaarsimavoq. Nuussinerit takku ataatsimut isigalugu ilanngaattissat ilanngaatigereerlugit missingersuutininut sunniuteqanngillat.

4.4 Aningaasaqarnermut Akileraartarnermullu Ataatsimiititaliamit akuersissutigineqartut

Ingerlatsinerimut aningaasaliissutit

Ingerlatsinerimut aningaasaliissutinik allannguinerit ilanngaattissat ilanngaatigereerlugit 42,104 mio. kr.-inik nalillit Aningaasaqarnermut Akileraartarnermullu Ataatsimiititaliamit akuersissutigineqarput. (Missingersuutitigut ajorseriaat).

Tapiissutit aningaasaliissutit

Tapiissutit aningaasaliissutinik allannguinerit ilanngaattissat ilanngaatigereerlugit -34,871 mio. kr.-inik nalillit Aningaasaqarnermut Akileraartarnermullu Ataatsimiititaliamit akuersissutigineqarput. (Missingersuutitigut pitsanngoriaat).

Aningaasaliissutit inatsisitigut pisussaaffigisat

Inatsisitigut pisussaaffigalugu aningaasaliissutininut allannguutit ilanngaattissat ilanngaatigereerlugit 233.000 kr.-inik sunniutillit 2018-imi Aningaasaqarnermut Akileraartarnermullu Ataatsimiititaliamit akuerissutigineqarput. (Missingersuutitigut ajorseriaat).

Isertitassat aningaasaliissutit

Isertitassat aningaasaliissutinik allannguinnissamik Aningaasaqarnermut Akileraartarnermullu Ataatsimiititaliaq 2018-imi ilanngaattissat ilanngaatigereerlugit 0 kr.-inik sunniuteqartussamik akuersissuteqarsimavoq (Missingersuutininut sunniuteqanngitsumik).

Sanaartugassanut aningaasaliissutit

Sanaartugassanut aningaasaliissutinik allannguinnissamik qinnuteqaatit ilanngaattissat ilanngaatigereerlugit 132,060 mio. kr.-inik nalillit Aningaasaqarnermut Akileraartarnermullu Ataatsimiititaliamit akuersissutigineqarput (Missingersuutitigut ajorseriaat).

4.5 Inatsisartut Suleriaaseq pillugu Ataatsimiititaliaannit akuersissutigineqartut (suliassaqarfik 01)

Ingerlatsinermut aningaasaliissutit

Ingerlatsinermut aningaasaliissutinik allannguinerit ilanngaatisat ilanngaatigereerlugit 4.100.000 kr.-inik nalillit Inatsisartut Suleriaaseq pillugu Ataatsimiititaliaannit akuersissutigineqartut. (Missingersuutitigut ajorseriaat).

Tapiissutitut aningaasaliissutit

Tapiissutitut aningaasaliissutinik allannguinerit ilanngaatisat ilanngaatigereerlugit 1.850.000 kr.-inik nalillit Inatsisartut Suleriaaseq pillugu Ataatsimiititaliaannit akuersissutigineqartut. (Missingersuutitigut ajorseriaat).

5. Oqaasertaliussanik allannguinerit (inatsisissatut siunnersuummi § 2)

Oqaasertaliussat 25-it inatsisissatut siunnersuummi ilanngunneqartut. Oqaasertaliussat akuerineqartut taakku 2018-imi aningaasanut inatsimmi oqaasertaliussat taamaaqataat taarserpaat/ilasuserpaat. Taakku 25-it Aningaasaqarnermut Akileraartarnermullu Ataatsimiititaliap akuersissuteqarnera tunngavigalugu ilanngunneqartut.

6. Sillimmatinut kontomit 20.11.50-imit atugassiissutiginninnerit

2018-imut aningaasanut inatsit kontomi pingaarnemi 20.11.50-imi ingerlatsinermut sillimmatinik 10,0 mio. kr.-inik ilaqartillugu akuersissutigineqarpoq. Ukiumi aningaasanut inatsiseqarfiusumi 2018-imi ingerlatsinermut sillimmatit tamarmik atugassiissutigineqartut, taakkulu aningaasaliissuteqarnissamik suliassanut 3-nut atatillugu akuersissutigineqarlutik.

7. Aningaasaqarnermut Akileraartarnermullu Ataatsimiititaliap nalinginnaasumik oqaaseqaatai

7.1 Ataatsimut isigalugu

Aningaasanut inatsimmi oqaasertaliussat aammalu oqaasertaliussat, Aningaasaqarnermut Akileraartarnermullu Ataatsimiititaliamit kingusinnerusukkut akuersissutigineqartut 2018-imilu ilassutitut aningaasaliissutinut inatsimmi ilanngunneqartut naapertorlugit kontot pingaarneri assigiinngitsut kiisalu sanaartorerup iluani suliassat akornanni nuussinissanut Naalakkersuisut piginnaatinneqartut.

Nuussinissat akuersissutigineqarsimatillugit aningaasaliissutinik allanngortitsinerit pinerit tamaasa inatsisissatut siunnersuummi aningaasaliissutinut takussutissiap, *ilanngussaq 1*-ip, immikkoortotaani (kolonne) ilanngunneqartarput. Missingersuutinut ilanngussani nuussinernut tunngavilersuutit aammalu Naalakkersuisut ulloq akuersissutiginniffiat allassimassapput. Kiisalu oqaasertaliussat, nuussinissamut tunngaviliisuusut pillugit paasissutissat nalunaarneqassapput.

7.2 Sulisorisat pillugit paasissutissat

Missingersuusiornermut malittarisassami 2008-meersumi immikkoortoq 5.2 Aningaasaqarnermut Akileraartarnermullu Ataatsimiititaliamit innersuussutigineqassaaq, tassani sulisorisanut tunngatil-lugu paasissutissiissutigineqartussat pillugit malittarisassanik Naalakkersuisut aalajangersaapput.

8. Aningaasaqarnermut Akileraartarnermullu Ataatsimiititaliap inatsisissatut siunner-suummut oqaatigiumasai allat

8.1 Nalinginnaasumik oqaaseqaatit

Aallaqqaasiutigalugu isumaliutissiisummi immikkoortoq 3 innersuussutigineqarpoq, tassani suliat amerlassusiat, qinnuteqaatinik Aningaasaqarnermut Akileraartarnermullu Ataatsimiititaliap suliarin-ninnerata inerneru naapertorlugit agguataakkamik nalunaarsorneqarsimallutik.

Aalajangiinerni arlalinni ilassutitut paasissutissanik Naalakkersuisut ataatsimiititaliamit qinnuigi-neqarput. Taakku pisariaqarnera naapertorlugu aalajangiinerni ataasiakkaani aamma taaneqarput. Kiisalu aalajangiinini Inatsisartut nittartagaanni uani pissarsiarineqarsinnaasut ataatsimiititaliap innersuussutigissavaa: <http://inatsisartut.gl> Aningaasaqarnermut Ataatsimiititaliap aalajangigai.

9. 2018-imi aningaasaliissuteqarnissamik suliassanut oqaaseqaatit

Aningaasaliissuteqarnissamik suliassanut 2018-ip ingerlanerani ataatsimiititaliamut nassiunneqar-tunut ataatsimiititaliaq ima oqaaseqaateqassaaq.

Aalajangiinerit ilaat taakku arlallit aningaasaliissutinik allannguinerit aalajangersimasut kisiisa pin-nagit aammali maleruagassanik atuineq pillugu tunngaviummik isigineqartariaqartunik aamma imaqarput.

9.1 Tunngavik pingaarutilik

Aningaasaliisarnermi tunngavik pingaaruteqartoq tassaavoq aningaasaliissutinut inatsimmi Inatsi-sartunit akuerineqartumi tunngavissiisoqarsimatinnagu Namminersornerullutik Oqartussat aningaa-sartuuteqaqqusaannginnerat. Sanaartornermut kontot eqqaassanngikkaanni aningaasaliissutit konto pingaarnertit aqutugalugit aningaasaliissutigineqartarput. Sanaartornermut kontoni aningaasaliissutit **sanaartugassanut ataasiakkaanut** aningaasaliissutigineqartarput.

Taamaattumillu sanaartugassanut aningaasaliissutit aammalu aningaasanut inatsisip akuersissu-tigereernerani nuussinerit ilassutitut aningaasaliissuteqarnissamik qinnuteqaat tunngavigalugu Inat-sisartut Aningaasaqarnermut Akileraartarnermullu Ataatsimiititaliaannit siumoortumik akuerine-qaqqaartariaqarput.

Ataatsimiititaliap suliaani nr. 01.31.06/18 – 00813-imi, konto pingaarnermi 89.72.12-imi, inissia-liassanut taartissanillu inissialiortiternermut tunngasumi, aammalu konto pingaarnermi 01.10.15-imi, Inatsisartut ataanni sanaartornermut aserfallatsaaliinermullu tunngasumi, nuussinermut tunngasumi Naalakkersuisunit ilaatigut inassutigineqarpoq:

”kontomi pingaarnermi 89.72.12 Inissialiassat taartissanillu inissialiortiterneq suliassanut nr. 100.31.046 Inissianik nutarterineq, Aasiaat aningaasaliissutit 8,7 mio. koruuninik amerli-neqassasut”

Ilaatigut ima oqaaseqaateqarluni Naalakkersuisut inassuteqaataata akuersissutiginiissaa Aningaasaqarnermut Akileraartarnermullu Ataatsimiititaliap toqqarpaa:

”Aningaasat atorneqareerneranni aningaasaliissuteqarnissamik qinnuteqaatit ataatsimiititaliamit nalinginnaasumik suliarineqarneq ajormata ataatsimiititaliamit erseqqissaatigineqassaaq. Aammalu ilassutitut aningaasaliissuteqarnissamik qinnuteqaatit aningaasat ukiuannut ingerlasumut atuuttut kisimik ataatsimiititaliamit akuerineqarsinnaapput. Taamaattumillu atuneq namminermit ataatsimiititaliamit akuerineqarsinnaanngilaq. Naatsorsuusiornerli paasinar-tooqqullugu aningaasat atorneqarsimasut naatsorsuutitigut eqqortumik suliarineqartariaqarnerat ataatsimiititaliamit paasilluarneqarsinnaavoq. Taamaattumillu aningaasat suliassap nutaap Naalakkersuisut inassuteqaatiminni allassimasaata ataani naatsorsuutitut ilanngunneqarsinnaanerata ataatsimiititaliamit ilalernerqarsinnaavoq. Ataatsimiititaliamit erseqqissarneqassaaq pisoq ataasiartumik pimmat aammalu suliap naatsorsuutitigut eqqortumik pineqarnissaannik kissaatip akuerineqarnera missingersuusiornermut inatsimmi aalajangersakkat malinneqannginnissaannik maligassiinngimmat.”

9.2 Ukioq aningaasanut inatsisip atuuffia

Aningaasaliissutitut inatsit tassaavoq aningaasanut inatsit, ukiup aningaasaqarfiusup aallartinnera sioqqullugu akuerineqartoq nunattalu karsiata missingersuutaanik imaqartoq. Alla tassaavoq ilassutitut aningaasaliissutitut inatsit, aningaasanut inatsisip akuerineqarnerata kingorna aningaasaliissutit allannguutaannik imaqartoq.

Ilassutitut aningaasaliissuteqarnissamik qinnuteqaatit aningaasanut inatsisip akuerineqarnerata kingorna ukiumut aningaasanut inatsisip atuuffianut suknulluunniit atuuttumut atuuttussaanerata ataatsimiititaliamit Naalakkersuisunut eqqaasitsissutigineqassaaq. Taamaattumillu ilassutitut aningaasaliissuteqarnissamik qinnuteqaatit iliuutsinut ukiumut aningaasanut inatsisip atuuffianut siulianut ukiumulluunniit aningaasanut inatsisip atuuffissaanut aggersumut tunngasuussanngillat.

9.3 Pingaaruteqartuunissaannik sillimaffigereerneqarsinnaasimannginnissaannillu inatsimmi piunasaqaat

Ukiumi qaangiuttumi aningaasaliissuteqarnissamik suliassat tunngavigalugit isumaqarnarpoq missingersuusiornermut malittarisassap 2018-imeersup ataqqineqarnissaata eqqaasitsissutigineqarnissaa nalinginnaasumik pisariaqartinneqartoq. Aalajangersakkakut aalajangersarneqarpoq nutaanik aningaasaliissuteqartoqarnissaannik aningaasaliissutinilluunniit allanngortitsisoqarnissaannik qinnuteqaatit taamaallaat aningaasaqarnikkut iliuusissanut *pingaarutilinnut* aammalu aningaasanut inatsisissap suliarinerani *sillimaffigereerneqarsinnaasimanngitsunut* tunngasuussassat.

Pingaaruteqartuunissaannik tunngavimmut tunngatillugu ataatsimiititaliaq isumaqarpoq taanna missingersuusiornermut inatsimmi tunngavimmut pingaarutilimmut allamut qanimut attuumasuteqartoq, tassalu Inatsisartut aningaasaqarnikkut tullerriiaarinerata aningaasanut inatsisip akuersissutigineqarneranut atatillugu ukiumut ataasiarluni pisartoq aammalu ukiumoortumik tullerriiarneq kingorna ilassutitut aningaasaliissutitigut aalajangiisuusumik allanngortinneqaaqusaanngitsoq.

Iliuutsit aningaasanut inatsisissap suliarinerani *sillimaffigereerneqarsinnaasimannginnissaannik* tunngavimmut tunngatillugu taamaattoqarnerata ilassutitut aningaasaliissuteqarnissamik qinnuteqaammi ilimanarsisinneqarnissaa pingaaruteqarpoq.

9.4 Missingersuutitut sunniuteqannginnissaq aningaasaqarnermillu aqutsineq

Ingerlatsiviup naammaginatut aqqissuunneqarsimanissaa, tassungalu ilanngullugu Naalakkersuisoqarfiup pitsaasumik sunniuteqarluartumillu aningaasaqarnermillu aqutsivigineqarnissaa suliaassarfinnut ataasiakkaanut akisussaasutut Naalakkersuisuusut qulakkiigassaraat.

Missingersuutitut malitseqartitsinerup paasinarsisippagu atuinerussuteqarsinnaaneq aarlerinaateqartoq aningaasaliissutit eqqortinneqarnissaasa qulakkeerneqarnissaanut pisariaqartunik iliuuseqartoqassaaq imaluunniit ilassutitut aningaasaliissuteqarnissamik qinnuteqartoqassalluni. Tassunga atatillugu ukiup ingerlanerani aningaasaliissuteqarfigineqarqinnissamik qinnuteqaatit Naalakkersuisoqarfiup suliaassarfiata iluani suliaassarfinni allani sipaaruteqarnissamik siunnersuummik ilaqartinneqassapput. Aningaasartuutit sillimaffigineqarsinnaasimanngitsut aningaasalersornissaannut ukiumut 10 mio. kr.-it konto pingarnermi 20.11.50-imi, ingerlatsinermut sillimatinut tunngasumi, aningaasaliissutigineqartarput.

9.5 Oqaasertaliussat

Ilassutitut aningaasaliissuteqarnissamik qinnuteqaatit piareersarlugit suliarineqarnerannut atatillugu oqaasertaliussani attuumassuteqartuni piginnaatitsissutaasimasinnaasut Naalakkersuisunit eqqumaffigineqartarnissaat ataatsimiititaliamit kaammattuutigineqassaaq. Piginnaatitsissummik tunniusisoqareersimappat piginnaatitsissutigineqartullu iluani iliuuseqartoqarpat ilassutitut aningaasaliissuteqartoqarnissaanik qinnuteqarnissaq pisariaqanngilaq. Missingersuusiornermut malittarisassaaq ataatsimiititaliamit innersuussutigineqassaaq, taanna malillugu suliaassani oqaasertaliussaaq aqqutigalugu nuussinissamik akuersinissamut Naalakkersuisut piginnaatinneqarfianni suliaassamik Aningaasaqarnermut Ataatsimiititaliamut nassiussisoqassanngilaq.

Suliaq nr. 01.31.06/18 – 00823-mi aalajangiinnermini oqaaseqaatini annertuut ataatsimiititaliap innersuussutigissavai. Timikkut nappaatinut tunngatillugu napparsimasut nunani allani katsorsarneqartarnerannut aammalu tarnikkut nappaatinut tunngatillugu napparsimasut nunani allani katsorsarneqartarnerannut Peqqinnissaqarfimmut aningaasaliissutitut ilassutitut aningaasaliissuteqarnissamik qinnuteqaat.

9.6 Pissutsit allat

Ilassutitut aningaasaliissuteqarnissamik qinnuteqaatinut atatillugu suliaassamik allaaserinninnermini peqqissaarussinerunissaat ataatsimiititaliap Naalakkersuisunut nalinginnaasumik kaammattuutigissavaa. Taamaaliornikkut aalajangiinissamut naammattumik tunngavissaqannginneq pissutigalugu suliaassamik isummerfiginninnissaminik ataatsimiititaliap kinguartitsisariaqarnera annikillissinnavaa.

Ilaatigut suliaq nr. 01.31.06/18 – 00799/ 819/ 820-mut aalajangiinnermini oqaaseqaatini ataatsimiititaliap innersuussutigissavai.

10. Aningaasaqarnermut Akileraartarnermullu Ataatsimiititaliap kaammattuutai

Siunnersuutip matuma Inatsisartunit siullermeerneqarnera tunngavigalugu Naalakkersuisunut ima **kaammattuuteqarnissaq** pissutissaqartoq Aningaasaqarnermut Akileraartarnermullu Ataatsimiititaliap isumaqarpoq:

Kaammattuut nr. 1

Sanaartornermut aningaasaliissutit siunertanut aalajangersimasunut qanoq sukkanerusumik atugas-siissutigineqarsinnaanerat aammalu suliassat assigiinngitsut sukkanerusumik qanoq naammassineqarsinnaanerat isumaliutigeqqullugu Aningaasaqarnermut Akileraartarnermullu Ataatsimiititaliap Naalakkersuisunut **kaammattuutigaa**. Tamatuma saniatigut suliassanut aningaasaliussat Sanaartugassanut Iluarsagassanullu Aningaasaateqarfimmit utertitat nunap immikkoortuini, suliffissanik anertuumik pisariaqartitsisuni, allatut atorneqarsinnaanerat Naalakkersuisunit eqqumaffigineqartariaqarpoq.

Ataatsimiititaliap siuliani allassimasumik kaammattuuteqarpoq, naak nalunngikkaluarlugu Naalakkersuisut konto pingaarnermut 10.13.11-mut, aktiaateqarluni ingerlatseqatigiiffinnut toqqaannartumik aningaasartuutitut tunngasumut, oqaasertaliussaq nr. 1, oqaaseqatigiit arfernat naapertorlugu sanaartornermi suliniutitut atuinikinnerussutitut utertinneqarumaartussatut isigineqartunit piffissami 2018-imit 2022 ilanngullugu ukiumoortumik 50 mio. kr.-inik aningaasaliissuteqarnissamut piginaatinneqartut.

Ataatsimiititaliami ikinnerussuteqartoq, Partii Naleqqap ilaasortaataitaa, kaammattuut nr. 1-imit ima ikinnerussuteqarluni oqaaseqaateqarpoq:

”Aningaasaliissutit taakkoqqissaat ikattoriarluni atorneqarnissaanut akisussaassuseqanngitsumik aaliannngisarnerit Partii Naleqqap nipannginnarluni isiginnaaginnarsinnaanngilaa. Inatsisartut inatsisaat nr. 4 22. november 2018-imeersoq naapertorlugu Kallallit Airportimut 2.074 mio. kruuninik aningaasaliisoqarpoq. Danskit naalagaaffianik isumaqatigiissutip akuerineqarnissaanik aaliangerneq Naalakkersuisoqatigiinnit partiimillu tapersersortimik tapersersorneqarpoq, tassanilu aaliangerneqqarluni nunatta karsia 2.074 mio. kruuninik aningaasaliissasoq. Aningaasaliineq tunngaveqarpoq 2019-imit aningaasanut inatsimmi oqaaseqaatini 10.13.10 imm. 4 kiisallu imm.6 tassanilu nunatta karsiata aningaasaliinertigut Kallallit Airportimut pituttorneqarnera naqissuserneqarluni. Aningaasaqarnermut ataatsimiititaliap Naalakkersuisut piumasaqarfigisimavai aningaasaliissutit aaliangersimasumut siunertallit arlaleriarlugit allanut atorneqarneri unitseqqullugu, taamaalioneq akisussaassuseqanngitsumik ingerlatsinertut taakkartorlugu. Partii Naleqqamiit nunatta karsia siunertamut ataatsimut 2.074 mio. kruuninik aningaasaliissasoq akisussaassuseqanngitsumik ingerlatsinertut isigaarput, tassami inuiaqatigiit aningaaliivigineqarnissaat periarfissaarullugu aningaasaliisoqamat, tassungalu ilanngullugu Danskit naalagaaffianik isumaqatigiissutip akuerineqarnissaanik aaliangerneq inuiaqatigiinnut iluaqutaanngimmat, kisiannili Kallallit Airportimut kisimi iluaqutaalluni, tamannalu nunatta karsianut tunngatillugu ataqatigiinnera takusinnaanatigu.”

Kaammattuut nr. 2

Ilassutitut aningaasaliissutit pillugit missingersuutitut inatsimmi aammalu missingersuusiormi malittarisassami aalajangersakkanik atuinerminni Naalakkersuisut nalinginnaasumik peqqissaartumik atuinissaat Aningaasaqarnermut Akileraartarnermullu Ataatsimiititaliamit **kaammattuutigineqarpoq**. Suliambut siuliani taaneqartumut nr. 01.31.06/18 – 00823-mut atatillugu aalajangiinermi ajornartorsiutit ataatsimiititaliap taasai ataatsimiititaliamit innersuussutigineqassapput. Kiisalu Peqqinnissaqarfimmi aningaasaliissutinik aningaasaqarnikkut allaffissornikkullu aqutsinerup sukumiisumik misissorneqarnissaa pisariaqartinneqartoq ataatsimiititaliamit maluginiarneqarpoq. Ataatsimiititaliaq isumaqarpoq ajornartorsiutip taassuma aaqqiivigineqarnissaa kinguarneqqinneqarsinnaanngitsoq. Suliassaq taanna assut pingaarteqqullugu Naalakkersuisut ataatsimiititaliamit **kaammattorneqarput**.

Kaammattuut nr. 3

Qupperneq 5-imi takussutissiami takuneqarsinnaasutut suliassat ukiuni kingullerni pingasuni ataatsimiititaliamut suliassanngorlugit nassiunneqartut ataatsimut isigalugu amerliartorsimapput. Tamanna tunngaviusumik isigineqartariaqarpoq, tassami aningaasaliissuteqarnissamik suliassat amerlasuut angusassanullu missingersuutigineqartunik 145,0 mio. kr.-inik ajorseriartitsisut Nunatta Karsiata aningaasartuutissaasa *ataatsimoortumik pingaarnersiorlugit tulleriaarneqarnerannik* aningaasanut inatsisip ersersitsisuunissaanik missingersuutitut inatsimmi tunngavimmut naapertuutinngimmata. Naalakkersuisut aningaasaliissuteqarnissamik suliassanik sapinngisamik ikilisaanissaat ataatsimiititaliamit **kaammattuutigineqarpoq**.

11 Aningaasaqarnermut Akileraartarnermullu Ataatsimiititaliap oqaaseqaatai:

Aningaasaqarnermut Akilerartarnermullu Ataatsimiititaliaq allanik oqaaseqaatissaqanngilaq.

12. Aningaasaqarnermut Akileraartarnermullu Ataatsimiititaliap inassuteqaatai

Siuliani allassimasut tunngavigalugit siunnersuut **akuerineqassasoq** ataatsimiititaliap isumaqatigiittup inassutigaa.

Taama oqaaseqarluni Inatsisartut Aningaasaqarnermut Akileraartarnermullu Ataatsimiititaliaata 2018-imi ilassutitut aningaasaliissutitut inatsisissatut siunnersuut aappasaaniigassanngortippaa.



Hermann Berthelsen,
formand




Peter Olsen



Jess Svane




Múte Bourup Egede



Karl Kristian Kruse



Randi V. Evaldsen



Jens Napaattooq